


畫
壘
集
附補遺





畫 壇 集

附 補 遺

張 舜 民 撰

王雲五主編

叢書集成初編

畫 壇 集

附補遺

中華民國二十四年十二月初版

撰 者 張 舜 民

發 行 人 王 雲 五

印 刷 所 商 務 印 書 館

發 行 所 商 務 印 書 館

上海及各地

上海河南路

上海河南路

畫墁集

提要

臣等謹案畫墁集八卷。宋張舜民撰。舜民字芸叟。自號浮休居士。邠州人。中進士第。以司馬光薦。爲監察御史。徽宗時。進吏部侍郎。旋以龍圖閣學士知定州。改同州。坐元祐黨。謫楚州團練副使。商州安置。復集賢殿脩撰。卒。事蹟具宋史本傳。舜民爲人忠厚質直。慷慨喜論事。葉夢得巖下放言。稱其尙氣節而不爲名。北宋人物中。殆難多數。其初從高遵裕西征靈夏。無功而不還。舜民作詩。有靈州城下千枝柳。總被官軍斫作薪。及白骨似沙沙似雪。將軍休上望鄉臺之句。爲轉運判官李薪所奏。謫監郴州酒稅。其後起爲臺官。浸至通顯。而議論雄邁。氣不少衰。崇寧初。又以謝表譏謗。坐貶。晁公武稱其文豪縱。有理致。最刻意於詩。晚作樂府百餘篇。自序云。年踰耳順。方敢言詩。百世之後。必有知音者。其自矜重如此。周紫芝太倉稊米集。有書舜民集後一篇。稱世所歌東坡南遷詞。回首夕陽紅盡處。應是長安二語。乃舜民過岳陽樓作。又舜民題庾樓詩。有萬里秋風吹鬢髮。百年人事倚闌干之句。世或載之東坡集中。蓋由其筆意豪健。與蘇軾相近。故後人不能辨別。往往誤入軾集也。文獻通考載舜民畫墁集一百卷。奏議十卷。周紫芝謂政和七八年間。京師鬻書者。忽印是集。售者至

填塞衢巷事喧復禁如初。而南渡後。又有臨川雕本浮休全集。蓋其著作。在當日極爲世重。而自明以來。久佚不傳。惟永樂大典尙間載之。計其爲什。雖不及什之一二。然零璣斷璧。倍覺可珍。謹蒐輯排比。釐爲八卷。用存崖略。其郴行錄。乃謫監酒稅時紀行之書。體例頗與歐陽修于役志相似。於山川古蹟。往往足資考證。今亦並附集末焉。乾隆五十年二月恭校上。

總纂官臣紀昀

臣陸錫熊

臣孫士毅

總校官臣陸費墀

本館據知不足齋
叢書本排印初編
各叢書僅有此本

畫墁集卷一

汾州 張舜民 芸叟 撰

詩

紫騮馬

紫騮馬。白面郎。紅銀鞍勒青油韁。左牽黃犬右擎蒼。朝從灞陵獵。莫宿投平康。使酒不滿意。按劍叱天狼。今年明年一如此。後年不覺髮成霜。扶肩策杖出門行。抱子弄孫樓上坐。忽然涕淚滿衣襟。爲見驂驄面前過。

關山月

明月生海上。裴回照邊城。中夜關山靜。但聞流水聲。征人看月思鄉泣。夜久衣單難獨立。錦字佳人怨不歸。開幃更感飛螢入。

桃李花

紅白桃李花。馨香滿芳草。開時人少年。落處人已老。風雨半夜來。飄揚滿官道。行客爲歎息。不忍便除掃。猶有兩三枝。香色晚更好。把酒將奈何。攀折恨不早。

二

花如桃李人如玉。終日看花看不足。萬年枝上囀春風。七絲絃上調新曲。寶馬嘶風車擊轂。東市鬪鷄西市鞠。但得長留臉上紅。莫辭貴買尊中醪。

來日大難

去日滔滔似易得。來日藐藐若大難。一日且作一日調。百年莫作百年看。晉侯竟爾見新麥。楚王更要食熊蹯。勿輕白髮翁。勿恃青楊質。物壯則老矣。其壽不可必。嵇叔夜。郭景純。今般人物如何人。皇天何不留逡巡。

君馬黃

君馬良。乘乘黃。僕臣御。守法度。乍可三驅失前禽。不可一朝爲詭遇。假使四牡項領。無害六轡。如組周旋。中規折旋中矩。聽和鸞之聲。遵康莊之路。馬不駭輿。君子安處。如欲登九折之險。走羊腸之阻。蒙犯霜露。跌踢風雨。雖使造父再生。王良復出。予亦未知其如何爾。

大雪行

曉辭洛水濱。暮宿河之涘。四野漫漫不見人。竟日止能行數里。渾然天地爲一色。渭水南北復何似。五陵鷹犬爭合圍。十宅管絃初熱耳。連宵耿耿照鬢髮。迎馬點衣猶未已。但得來年春麥熟。暫困泥塗復何恥。農夫南畝未厭多。卻入長安作泥滓。

邯鄲少年

邯鄲全盛時。人物自都雅。更得幽并兒。豪氣陰相假。生求趙王劍。千金不論價。力購燕國姝。臨高起亭榭。使酒叢臺上。夜獵西陵下。聞說五陵兒。臂鷹馳犬馬。

試院感懷

朱戶當晝扃。霜簾達夜懸。沈沈造廣庭。皦皦接衆賢。疎莖叩洪鐘。短綆汲深淵。始知學不迨。內顧多歉然。憶昔居上庠。忝出流輩前。賦就千金直。詩成萬口傳。荀楊迴接迹。班馬思比肩。一從苟干祿。永謝英俊躔。折腰府縣中。餬口道路邊。世俗多見輕。義士誰哀憐。憔悴有今日。光輝思昔年。今茲覩秋闈。猶欲爭相先。枯魚傍江湖。疲馬憶薊燕。涼風拂翠幙。隴月向人圓。物景近中秋。客意孤綿綿。裴回望清光。欲攬不得全。永懷懽樂時。把酒謝嬋娟。

鯨魚

東海十日風。巨浪碎山谷。長鯨跨十尋。宛轉在平陸。雷火從天來。砉然剝兩目。肌膚煮作油。骨節分爲屋。腥羶百里內。戶戶至厭足。我聞海上人。明珠可作燭。鯨魚復何罪。海若一何酷。從欲讒風伯。大鈞問不告。躊躇復歎息。歸咎當溟瀆。託形天地閒。獨爾有含蓄。大者不能容。小者又何益。卻羨蝦魚輩。安然保家族。

東武二首

小白獎周室。夷吾致其君。各竭當時力。未免後儒言。駿馬日千里。壯士舉百鈞。更欲加勉策。折髀與推轅。景公登牛山。俯闕臨邑區。耕耘被廣野。軒冕充脩衢。鬪雞走狗馬。擊筑吹笙竽。魚鹽來海岱。桑柘入青徐。

饒樂曾無敵。棄背復何如。公乃歎而泣。願謂諸大夫。安得千萬年。長有此國都。大夫助公泣。獻壽猶歛歔。晏子斂袂笑。笑此君臣愚。世事如輪環。曾不借須臾。前此十數公。今已成丘墟。胡不長守此。乃與子孫居。始知富貴者。喜受庸人諛。豈獨當時笑。後世亦挪揄。

山陽二首

山陽水陸衝。樂餌人所赴。寂寞先生門。車輪不少駐。賢哉彼二公。綽有尙賢風。恨不生羽翼。嘯歌樽酒中。古人急於仕。每擇分所安。願爲趙魏老。不作滕薛官。今人不量力。臨老當繁難。少見詠淇澳。甚多歌伐檀。

淮口阻雨

己亥吳同年要飲舟次淮口作

旱久不得雨。旣雨不肯休。泆泆汴河水。初合淮河流。北來何處客。暫此駐扁舟。中有投荒人。萬里趨炎洲。聽水夜不眠。觀水朝亦愁。呼風捲重陰。放出赤日頭。捨舟出平地。走馬復西遊。

天爵山

耕者志於食。否則餒繼之。學者志於道。一爲好爵糜。本自不營利。閒或與利期。朝日入而處。暮日仰而思。浮雲蔽蔀屋。見前當自知。

李侯新齋植松竹聊爲雜言

嘗聞君子居。一日願必葺。李侯作新齋。制度皆自給。軒楹如肺腑。豁達可出入。取竹渭水濱。移松隴山隰。歲寒遠相依。勁節久孤立。栽培豈無法。根著至今溼。清風在目前。獨我得多挹。歸壤共無涯。往日不可及。

惟憂屬後人長伴邊聲急。

送葉伸出使河北

君今使河北。幾日渡黃河。脫身出臺省。杖節犯風波。東南耆舊中。如君能幾何。何人把袂留。顧我餞則那。燕趙多佳人。善舞體婆娑。不學白紵詞。能唱瓠子歌。歌罷令翁愁。井竈宅龜鼃。安得佐禹才。干旄飾五紵。與君並駕驅。坐使民氣和。揮汗強援筆。矢辭愧不多。

汧陽感事

人誰無婚姻。我則分鮮薄。卽今頭已白。不識外家樂。再過汧陽縣。心境何寂寞。當時退食地。東軒俯層壑。華屋變山丘。九原寧可作。空存遺愛樹。枝葉幾榮落。正如遼東歸。但見舊城郭。堂堂想其儀。物物皆如昨。眼看北來雁。身是南飛鵲。霜風掃隴廩。晚翠斂吳嶽。臨行更踟躕。灑淚徧南閣。

思善堂

春風長萬物。棘子猶卷然。及至華實稠。已悲霜露先。功隨四時去。不待三牲全。所以陟屺人。設身常捨旃。

鄉人言

郴江有奇石。似牛伏岸側。鄉人久相傳。過者有顛覆。我與鄉人謀。鑿去可勿留。祇消一日力。得弭千歲憂。鄉人顧我笑。官必有闡拙。大者不能圖。小者安能說。方今民間事。頗有急於石。當官貴居事。能不閑採拾。我家本多田。今乃身無居。雖有兒女輩。售人爲婢奴。破家不足悵。所恨骨肉離。官今將骨肉。好去將何之。

我雖有田里。亦聞官念此。念此不能爲。何用居官爾。乃指江中石。此物如有神。不覆廉善士。獨傾貪虐人。官今幸過此。行李都無害。將我言日思。勿爲貧賤懈。我聞鄉人言。背額俱汗流。欲問破家因。恐爲明者羞。

送羅正之年兄出使二浙

玉塵助清談。金貂飾高位。二物已殺身。無剝生民利。君爲使者官。猶作農夫事。隨軒載畚插。一心惟度地。惟梁及齊岱。潢汙變滯穗。玉食反無魚。黃牛如象貴。凡人畏辛苦。君處乃樂易。富哉太伯墟。吳越之委積。二年苦昏墊。竈臼成蛙肆。一日死百人。官司但熟視。不獲乃命君。物議已爲遲。君其尙勉旃。副彼朝廷意。若爲濬涇洪。可得露城市。誅其姑息人。戢彼因循吏。死者不可招。存者如何置。赴海與壑鄰。實繫君之智。君家本天台。立身頗勤勤。一生在州縣。晚歲稱憲使。南人重衣錦。今爾實自致。弭節拜墳墓。椎牛設鄉遂。翁媪上籬觀。揮零復嗟喟。咸曰羅家兒。今日乃如是。伊予出西北。仕路每相值。交代又同年。莫予論事契。嗜好無不同。出處亦有類。天台與四明。一生游夢寐。淡蕩春風中。都門把歸袂。行與興公游。閒過賀老醉。二客儻有言。因風幸相寄。

送薛昌朝赴太原幕府

去國重爲客。送君還復歸。天寒雨細光景促。且就東城寺中宿。寺當蒲坂望屋廬。日暮無由辨喬木。旣已唯諾難自由。雖欲一日安可留。吾輩事勢不大殊。此際興味復何如。歸來愁坐獨嗟吁。畢竟豈如村野老。或爾富民城郭居。雨暘寒燠都不與。親戚滿眼身不孤。乃知平生走薄宦。正似癡牛引重車。險夷繚絡不

知止。祇得終年困道塗。

贈奉議沈遼

鳧脛天生短。鶴脛本來長。一朝有客欲斷續。二物無地逃悲傷。吾徒曾匪鳧鶴匹。又取聖賢爲學術。解將軒冕等浮雲。寧免儻來并執一。夫君擢秀居東南。代以文詞起簪紱。錚錚官業素有聞。更號能書居第一。平生意氣少防閑。一跌落在江湖閒。幾年轉徙無家室。惟與漁樵爲往還。醉吟未免寫胸臆。健筆依舊飛雲煙。遠俗僻陋多不識。都城一帖沽萬錢。今朝我過齊山下。邀我陟降遊二山。羨君卜築思意盡。今古氣象羅目前。佛留九頂千株石。天賜清溪一水灣。自拾薪枝給朝夕。不與城郭通交關。親友一切皆謝絕。惟許子馳來問安。人生涉世多憂喜。不用昭昭明物理。少小辛苦卜一廬。如今老大無居止。遷流方從五嶺去。敢望生還復經此。萬一君恩縱北歸。與君左右爲鄰里。

還李穀士雄卷

河汾之會。韓晉之津。在昔王馬。今何人。青衫木笏。排風塵。面如桃花。髭如銀。長篇大字。妙入神。關輔後輩。誰等倫。四方仕宦。足遭迍。歸老闕鄉。玉澗濱。雲爲友。兮山爲鄰。森森綠槩。萬霜筠。汨汨清漣。飛兩輪。亭上何所見。荆山早。暮來相親。齋中何所有。新舊歌詩。千百首。細大搜羅。萬象勞。放開日月。東西走。世上兒女。徒紛紛。作者須教。歸老手。君不見。古往今來。富貴人。燦燦金章。懸紫綬。金珠初入。寵方深。骨肉未消。名已朽。又不見。李杜死來。三百年。至今仰望。如星斗。一聯一句。挂齒牙。便同金石。垂長久。乃知皇天。造萬物。獨

於吾輩偏加厚。還翁詩卷翁細思。豈是生平都不偶。

禪僧福公寄惠牧牛圖答以問牛歌

訶訶訶。棲巖老法師。寄我牧牛頌。我是人間百歲人。今朝卻作嬰兒弄。堪笑其間有一牛。滿身變白尾猶黑。想君不是上上根。教人費盡閒心力。我昔有一牛。其毛元自白。如今牛已無。欲求不可得。蓑笠與鞭繩。同時皆棄擲。身心無住著。冷坐溪邊石。卻問山中人。閒尋牧牛客。

書節孝先生事實於先生詩編之後

古人往矣名空存。爾來冠帶誰其倫。語言淵騫行盜跖。俯仰不愧何續續。先生道義完且潔。去彼取此非今人。事親豈但綵衣戲。刻木省定長悲辛。拋官卻掃醉經史。胸中無復留纖塵。履穿袍敝突不墨。辭幣與粟甘清貧。自從秀髮到白首。造次於是非一晨。當知有昊憫澆散。先生故出拔斯民。嗟余稟賦雖不敏。管窺偶辛知所因。講聞先生亦已久。云爲輒以書諸紳。竭來廣陵兩閱歲。所得比舊尤加親。此編雅什盈數百。覃思成誦驚余神。恍如聽樂周太廟。黃鐘大呂曠且純。又如典瑞出圭璧。璀璨溢目非玦珉。偉哉固足信萬一。髣髴想見容彬彬。吾皇圖治急遺逸。空谷相望推蒲輪。先生高臥焉得遂。細札匪日頒嚴闈。重慚韁鎖脫無計。灑掃猶阻致此身。願言師法不少懈。異日有立逃湮淪。

跋百之詩畫

詩是無形畫。畫是有形詩。丹青不知老將至。李陵蘇武真吾師。太平本學治禮樂。猶有暇日能臨池。區中

孰最奇。龐眉皓首苟住著。安得一區我安之。

京兆安汾叟。赴辟臨洮幕。府南舒李君。自畫陽關圖。并詩以送行。浮休居士爲繼其後。

古人送行贈以言。李君送行兼以畫。自寫陽關萬里情。奉送安西從辟者。澄心古紙白如銀。筆墨清輕意蕭灑。短亭離筵列歌舞。亭亭誼誼簇車馬。溪邊一叟靜垂綸。橋畔俄逢兩負薪。掣臂蒼鷹隨獵犬。聳耳駢驢扶隻輪。長安陌上多豪俠。正值春風二三月。分明朝雨浥輕塵。客舍青青柳色新。主人舉杯苦勸客。道是西征無故人。殷勤一曲歌者闋。歌者背淚霑羅巾。酒闌童僕各辭親。結束韜滕意氣振。稚子牽衣老人哭。道上行客皆酸辛。惟有溪邊釣魚叟。寂寞投竿如不聞。李君此畫何容易。畫出漁樵有深意。爲道世閒離別人。若箇不因名與利。紅蓮幕府盡奇才。家近南山紫翠堆。烜赫朱門當巷陌。潺潺流水遶亭臺。當軒怪石人稀見。夾道長松手自栽。靜鎖園林鶯對語。密穿堂戶燕驚迴。試問主翁在何所。近向安西幕府開。歌舞教成頭已白。功名未立老相催。西山東國不我與。造父王良安在哉。已卜買田箕嶺下。更看築室潁河隈。憑君傳語王摩詰。畫箇陶潛歸去來。

打麥

打麥打麥。彭彭魄魄。聲在山南。應山北。四月太陽出東北。纔離海嶠麥尙青。轉到天心麥已熟。鷓鴣旦催人夜不眠。竹雞叫雨雲如墨。大婦腰鎌出小婦。具筐逐上壠。先捋青。下壠已成束。田家以苦乃爲樂。敢憚頭枯面焦黑。貴人薦廟已嘗新。酒醴雍容會所親。曲終厭飫勞童僕。豈信田家未入脣。盡將精好輸公賦。次

把升斗求市人。麥秋正急又秧禾。豐歲自少凶歲多。田家辛苦可奈何。將此打麥詞。兼作插禾歌。

畫墁集卷二

詩

梅子

月破冥冥雨。枝搖閃閃黃。口中先水出。衣上帶花香。肺疾須拚醉。牙疎不耐嘗。調羹無復用。山谷日傾筐。

巖花

託根何太遠。得地亦相宜。土石生爲偶。紅香想自知。風英將片片。雨實漸離離。戍客思攀折。無何歷處危。

矴齋獨坐懷兄弟

並橋冰乍泮。隔岸柳初黃。河上春猶淺。天涯日漸長。平時好行樂。往事入思量。最恨三年別。應添兩鬢霜。

東行別矴齋

宴坐豈不好。有誰強爾行。山川不改色。兒女若爲情。岸隔霜林意。齋空夜水聲。虛傳少陵叟。一室過生平。

秋日書懷

涼風起天末。何物動人愁。一室關河暮。三年草木秋。高文誰弔屈。晚節漫依劉。獨怪瀼西叟。巴江得久留。

秋暮書懷